



Inatsisartunut ilaasortaq
Doris J. Jensen, Siumut
/Maani

**Ujaqqat erlinnartut aamma ujaqqat pinneraasiassat pillugit § 37
naapertorlugu apequteqaammut nr. 2019/293-imut akissut.**

Suliap nr. 2019-18827
Dato: 16/09/19

Asasara Doris J. Jensen.

Apeqqutit matuma kingulianiittut Inatsisartut Suleriaasianni § 37 naapertorlugu Naalakkersuisunut saqqummiuppatit, taakkualu matumani akissuteqarfigineqarput. Akissuteqaat Akileraartarnermut Aqutsisoqarfimmit ilassuteqarfigineqartoq, suliarineqarpoq.

Postboks 930
3900 Nuuk
Tlf. (+299) 34 68 00
E-mail: asn@nanoq.gl
www.govmin.gl

**1. Nunatsinni ujaqqat nunatsinniit akuerisaanani
anninneqarsinnaanerat nunanut allanut, pinngitsoortinniarlungu
naalakkersuisut suliniuteqarpat?**

Akissut:

Aatsitassanik annissinissamut maleruagassat aatsitassanik tuniniaaneq aamma avammut annissuineq pillugit Namminersorlutik Oqartussat nalunaarutaat nr. 5, 26. juni 2019-imeersumi allassimapput. Aatsitassanik tunisinnermut annissinermullu atatillugu inuinnaat pisinnaatitaaffii pisussaaffiilu nalunaarummi erseqqissarneqarput. Tassani allassimavoq, aatsitassanik annissineq, pisinermut allagartamik imaluunniit avammut nioqquteqarnissamut akuersissummik takutitsinikkut, aatsaat pisinnaasoq. Aatsitassanut ikummatissanullu inatsimmi § 45e, imm. 3 naapertorlugu aatsitassat aalajangersimasumik najugaqartumit pisarineqarsimappata aammalu pisineq uppersararqarsinnaalluni, aalajangersimasumik najugaqartuunngitsut (takornariat il.il.) inuussutissarsiutigiginagu aatsitassanik annissinnaapput. Aalajangersimasumik najugaqartut taakkua nammineq atugassaappata imaluunniit nammineq allanut tunissutissaappata (tunissut), pisinermut allagartamik imaluunniit avammut nioqquteqarnissamut akuersissummik peqaratik aatsitassanik annissinnaapput

Aatsitassanut Aqutsisoqarfik suliniutinik arlalinnik, nalunaarutip ilisimaneqarneranik siamarteriviusussanik, aallartitsivoq. Ilaatigut

Akilerartarnermut Aqutsisoqarfimmi sulisut, kiisalu TelePost-imi, RAL-imi, Mittarfeqarfinni il.il. sulisut nassiussalerisartut ilinniartitaanissaat aallartinneqarpoq. Tamatuma saniatigut Aatsitassanut Aqutsisoqarfik nittarsaassinikkut arlalinnik suliniuteqarpoq, soorlu ussasaarutit takornarianut sammitinneqartut, inuit akornanni attaveqatigiittarfinni allagarsiinerit, Kalaallit Nunaanni suliffeqarfinnut anginerusunut tamaginnut paasissutissiinermi najoqqutassat, takornariartitsisartunut paasissutissiinermi najoqqutassat il.il.

Kalaallit Nunaannit nunanut allanut aatsitassanik inatsisunik unioqqutitsilluni annissuisoqarsinnaanera Naalakkersuisut eqqumaffigisorujussuaat.

Naalakkersuisut ilaatigut tamanna pissutigalugu killeqarfitsinni nakkutilliinermut suliassaqarfik annertuumik aalluppaat, taamaattumillu Naalakkersuisut aamma Akilerartarnermut Aqutsisoqarfimmi nakkutilliinermik suliaqarnermut aningaasaliissutit amerlineqarnissaat qulakkeersimavaat. Akilerartarnermut Aqutsisoqarfiup ilanngaaserinermut periusissiaq Inussuk 2018-2023 suliaraa, tassani suliniuteqarfissat ilaat tassaalluni suliaqartuusunik allanik suleqateqarnerulernissaq, ilanngullugit pisortani oqartussat, soorlu assersuutigalugu Aatsitassanut Aqutsisoqarfik.

Taamaattumik ukiuni kingullerni Aatsitassanut Aqutsisoqarfiup aamma Akilerartarnermut Aqutsisoqarfiup akornanni suleqatigiinneq annertusarneqarsimavoq. 2018-imi Akilerartarnermut Aqutsisoqarfiup umiarsuit marluk misissuiffigai. Akilerartarnermut Aqutsisoqarfik aamma Aatsitassanut Aqutsisoqarfik ataatsimoorlutik, angallatinut nunanit allaneersunut sammititamik, 2019-imi ulluni sisamani Kujataani misissuinerimik suliaqarput. Misissuinerimik ujaqqanik erlinnartunik imaluunniit ujaqqanik pinnerasaasiassanik anngiortumik annissiniarsarisarneranik paasisaqartoqanngilaq.

2. Qanoq annissuisoqarsinnaanera pinngitsoortinniarlugu nakkutilliisoqarpa?

Akissut:


Takuuk apeqqummut nr. 1-imut akissuteqaat.

3. Taamaassimangippat annissuisoqarsinnaanera pinngitsoortinniarlugu qanoq suliniuteqartoqarniarpa?

Akissut:

Takuuk apeqqummut nr. 1-imut akissuteqaat.

Inussiarnersumik inuulluaqqusillunga

A handwritten signature in black ink, appearing to read 'Erik Jensen'. The signature is written in a cursive style with a large, looping initial 'E'.

Erik Jensen